

周

官

析

疑

周官析疑卷之十六

臨桂陳榕門

高安朱可亭同訂

桐城方苞著

宿松朱字綠

春官宗伯第三

惟王建國辨方正位體國經野設官分職以爲民
極乃立春官宗伯使帥其屬而掌邦禮以佐王和
邦國

舜命伯夷典三禮名曰秩宗周人因之立春官

宗伯蓋以宇宙之中莫尊於天、莫尊於地、元人鬼而
禮有五經、莫重於祭、凶軍賓嘉始之、終之皆以
祭祀、蓋無事不以天神地、元人鬼臨之、所以作
其忠敬之心也、秩宗者、叙次天神地、元人鬼之
禮事也、宗伯者、治尊禮之長官也、若如俗說以
宗廟之宗爲日、其人則對先王先公、義不得以
稱伯矣、自唐以前注疏箋傳皆訓宗爲尊、至宋
王昭禹始謂有族則有祀、有祀則有宗、易氏祓
謂與大宗小宗同義、其支離悠謬不足辨也、蔡

氏沈以宗廟爲義。後儒多遵之。謂凡祭祀之禮。皆自祖宗推而及之。不知天神地祇之祭。本以宗名。舜典曰。禋於六宗。孔安國傳。宗尊也。所尊祭者有六。謂四時也。寒暑也。日也。月也。星也。水旱也。月。今天子乃祈。來年於天宗。賈逵曰。天宗三日月星地宗。三河海岱天神地祇。皆稱宗。乃秩宗之義。所由起也。夏殷以前。經傳未有稱宗廟者。有之。自周書始。蓋因殷有三宗。而殷人稱宗。實由夏書受命於神宗。孔傳曰。宗。文祖之廟。

孔疏曰言神而尊之也無逸篇昔在殷王中宗
孔傳曰殷家中世尊其德故稱宗卽蔡氏沈尙
書說亦云宗廟始祖之廟則祖宗及宗廟之宗
本以尊爲義而秩宗宗伯之掌三禮不得專以
宗廟爲義益著明矣

雞人

凡禮事舉之必以時其間動作止息又各有時
雞知時故掌以禮官之屬而凡告時噉旦之事
皆掌焉其職事首祭祀故與鬱人鬯人相次

典命

古者命賜羣下必於祖廟故冢宰詔王以爵祿
馭羣臣而典命司服則列於禮官

守祧

守祧用奄與女奚豈祭祀雖無女尸而先后之
朝祭服及遺器亦藏於祧與其職掌守先王
先公之廟祧而獨以祧名官何也舉祧則足以
該廟也諸侯朝聘禮辭多稱祧聘禮不喚先君
之祧春秋左傳
屬有宗祧之事於武城禮官列職以祧名官而經傳於天

子無稱祧者何也

易王假有廟尚書諸侯出廟門侯親禮侯氏內祖於廟門

之東他書亦無稱天子之太廟為祧者

天蓋后稷之廟文武之世室

雖藏先王先公之祧主而皆不祧之廟君天下

臨諸侯自當以后稷文武臨之故惟稱廟而禮

官辨世次之後先則宜舉祧以該廟也若諸侯

相接號辭必稱先君而邦交多始於所祧之祖

故亦舉祧以該廟焉后稷文王雖身不為天子

而德為聖人造邦新命故周人親享皆在后稷

之廟而遷鎬以後每發大命必至於豐周頌又

有率見昭考之樂章。皆周公運用天理之精蘊也。疏云七廟并姜嫄爲八。蓋據詩生民篇。與大司樂享先妣之文也。諸侯不敢祖天子。故禘以後特祀姜嫄。及有天下亦相因不改。其於都宮之旁。別建一廟。而歲時享祀亦不與九廟同日與。

世婦

六官皆卿一人。而宮卿則二人。何也。六官有貳以攝正。而宮卿無貳。故每官二人。以備其人喪。

疾或自有家事也。周官自夫人嬪婦以及女
奚闈寺皆掌於小宰內宰。復設宮卿世婦大夫
士以列職於官中。使王知深宮燕私一嘖一笑
中。外。臣。庶。皆。得。以。耳。而。目。之。所。以。止。邪。於。未。形。
而。正。君。心。謹。陰。禮。俾。表。裏。澄。澈。以。爲。萬。官。億。兆。
之。儀。則。也。且。使。有。德。有。齒。之。婦。人。日。周。旋。於。后。
夫。人。嬪。婦。之。間。則。耳。濡。目。染。然。化。潛。移。裏。隨。事。
而。調。劑。者。亦。不。少。矣。約葉生
西說

外宗

九嬪世婦女御爲治官之屬、內宗外宗爲禮官之屬、皆制禮之精意、

墓大夫

賈疏庶人不封不樹、故不言冢而言墓、非也、本職曰掌其度數、則非不封不樹明矣、

職喪

劉氏彝謂職喪所掌、下達萬民、本職並無此義、地官黨正所教喪紀之禮事、乃及萬民、鄭長以下、乃治其事耳、諸儒不考經文、而好立異說、不

可勝辨。徃徃如此。

大司樂

舜命夔典樂。以教胄子。其時詩書未具。易有畫而無文。禮初興而未備。惟樂乃郊廟朝廷閭門鄉里所通用。而附禮以行。學者陶養德性。舍是無可爲教。故二代因之。至周則詩書禮樂具備。而掌成均之法。猶以大司樂各官。蓋蒙士之學。必以樂爲始。君子之德。必以樂而成也。以中大夫爲之。則必賢德彰聞。負公輔之望。而爲凡有

道有德者所依歸。國之子弟所矜式者矣。師氏一人而大司樂二人者。虎門之教主於王世子。其共學而相衛翼。必聰明質仁。厲學敦行者。乃與焉。以一人爲之表率足矣。成均之教。則國子弟貴遊子弟。大夫元士之適子。國之俊選。諸侯之貢士。皆合焉。非二人不能共襄其事也。宗伯掌五禮而大司樂之教不言禮。何也。凡學士皆童而習之矣。且祭祀賓客射鄉軍愷禮行而後樂從之。平時歌詩學舞。春秋合舞合聲。樂作

而禮卽依焉故不必復言禮耳。

大胥

胥掌官叙以治叙樂官名胥以致諸子正舞位序官中之事皆治叙也大胥掌學士之版而小胥掌其徵令其事相成故皆別職同官而府史胥徒共之凡五官之司旅職業相聯者皆然所以便事而省役也。

大師

大師小師、瞽矇也、而爵以下大夫士、蓋知音識

微必明於天地之性。惟有道有德者能之。故作
匱謚聽軍聲。國之重事皆以屬焉。而周以前帥
多賢達。觀孔子正樂而魯之樂官竄身異國。匿
跡河海。不能一日安於其位。可知周公教澤入
人之深。

小師

周官人數皆量職以制之。師氏保氏各一人。事
不分也。大師二人。一以備軍事也。小師四人。雖
或攝大師。仍有自共其職者。

鐃師

磬音屬角而難調、磬音和則衆音皆依之、故同律既定、首列磬師而兼教編鍾、九夏之奏、獨以鍾鼓、故別設鍾師以掌之、笙以繼堂上之升歌、又與磬聲相應、故其職總教諸管樂、及春牘應雅而獨以笙、名官舉重也、鍾師之外、復設鐃師、以掌金奏之節、而王朝禮事、軍事、夜事之鼓、皆屬焉、非專官不能共也、笙師兼掌竹匏、土、木、四音、鐃師兼掌絲音、鐃師兼掌革音、而金音則鍾

罇二師之外、仍以磬師兼之、蓋禮事之用金爲多、其節奏又各異也、

鞀師

鞀、鞀氏掌四夷之樂、而特設鞀師、蓋周起岐雍、其化先行於南、次及於北、而東方獨阻、風教商奄既誅、淮夷徐戎尙爲魯患、故特設一官、肄東夷之樂、以志王化之難成、職方首揚州、亦此義也、

旄人

四夷有慕化而願留者、祭祀賓客、使各舞其國之燕樂、以示聲教之四訖、其思歸者亦聽焉、故無定數、疏謂鞀、鞀氏掌夷樂而不教、旄人教而不掌、非也、旄人所教舞也、鞀、鞀則掌聲歌、分職甚明、

大卜

孔子贊易、然後天下知貴筮、自周以前、重卜、故以大卜名官、而兼掌之、

占人

筮立占人、以下師筮人、致其誠壹、以聽所命、而心不可分用也。

筮人

筮人之徒、少於筮氏者、以龜有蕪蕪、吹燧之事、而筮儀較簡也。

占夢

殷宗恭默、傳說見夢、夢協朕卜、武王以誓師、大
人之占、著於小雅、傳記所載、祲祥凶變、先見於
夢兆者多矣、故周公特設掌夢之官、與卜筮、

禮相間皆聖人畏天省躬精誠之所貫注實事
所由修舉也。

祗禘

此職觀妖祥辨吉凶叙降皆與保章氏同而不
以類相從何也保章氏雖兼掌日月星辰風雲
之變而以星土辨地域以豐荒降禘象以十有
二風命乖別皆觀乎天文以察時變以詔救政
之事故與馮相氏爲類若日之有禘則人君之
象十輝之法乃所以使王隨時觸事恐懼修省

以弭災變故與卜筮占夢相從也

喪祝

其職事不止於祝而以祝名不止於喪而以喪名從所重也

甸祝

五官中如甸祝之類或兼官而臨事設之

詛祝

呂刑以覆詛盟爲有苗罪則隆古已有其事小雅出此三物以詛爾斯蓋理法情勢之窮有不

得不要言於鬼神者。世儒乃以此疑周官誤矣。
詳見總辨。

大史

王氏詳說謂左史記事、右史記言、而以大史內
史當之、非也。內史掌八柄、以詔王治、執國法、國
令、以考政事、受納訪、以詔王聽治。凡君舉之大
者、皆具於是矣。其他策命諸侯、卿大夫、制祿、出
賞、賜、亦事之不可不籍者、則記事者宜內史、外
史掌書外令、書使於四方之令、又掌四方之志。

達書名於四方、則記言者宜外史、惟大史職則
絕無可附於記事記言者、蓋大史稽天道、內史
外史記王之言動、王之言動宜奉若天道、故大
史爲史官之長、而內史外史左右於王、稱名之
義、疑取於此、

車僕

戎僕馭夫、具列夏官、掌戎車之萃者、宜以類從、
而別設車僕、隸於春官、何也、邱乘之法、兵車皆
民所自具、公卿大夫、賦輿有定、其自乘之車、始

則君賜繼自爲之。故政職別無掌戎車之官。與藏之之所。五路皆屬於巾車。故廣車闕車萃車輕車之萃亦隸焉。戎僕設於夏官。專掌王路。而兼倅車之政。車僕隸於春官。專共戎車之萃。與巾車聯職。以便更續。而馭夫則屬夏官。以閑輿衛。皆聖人處物體事精神所周浹。不可以不察也。

庸官析疑卷之十七

新建周力堂

漳浦蔡聞之同訂

桐城方苞著

安州陳廷彥

大宗伯之職掌建邦之天神人鬼地示之禮以佐
王建保邦國

記曰明乎郊社之禮、禘嘗之義、治國其如示諸
掌乎。能事天神人鬼地示。則餘四禮舉而措之
耳。故建保邦國。獨目此以著其義。天曰神妙。

萬物而不可見也。人曰鬼，其所歸也。地曰示，以
示爲義。五嶽四瀆，名山大川，顯然示人以法象
也。李光坡曰：邦禮有五，獨言掌吉禮者，禮有五
經，莫重於祭，舉首以該終也。建立也，保安也。
正倫理則立，篤恩義則安，上下各得其所而皆
安，故曰建保邦國也。

以吉禮事邦國之鬼神示

國家無故上下和睦以事天地宗廟百神乃入
事之最吉者故曰吉禮喪疾禍亂則祀事不能

舉矣。都家鄉邑皆有鬼神示之祀。此不言者統於邦國也。

以禋祀祀昊天上帝。

冢宰司徒所蒞祀事。皆首五帝者。舉五帝則昊天上帝不必言矣。此不及五帝者。舉昊天上帝則五帝可知也。司寇職禋祀五帝。則戒日以禋燎祀司中司命。覲師雨師。

先王制司中司命之祀。蓋以人受天地之中以生。必有賦之以性者。湯所謂降衷是也。既生而

有形氣。又必有制其死生修短之數者。孔子所謂命是也。王者相協生民之中。欲登之於仁壽。而消其疵厲。天札故特立神號以祀之。亦使民知所受之有中。以正其德。所稟之有命。以定其志也。日月星辰風雨。教以象設者也。司中司命。禮以義起者也。既有典祀。祝號然後天文家以三能文昌諸星當之。易曰。震萬物者莫疾乎雷。而不列祀典。何也。未有不雨而雷者。祀雨師則已。包雷師矣。

以血祭祭社稷。五祀五嶽以貍沉祭。山林川澤

李光坡曰：祀天神、祭地示其時、其地詳見大司樂。而此經以蒼璧禮天、以黃琮禮地、典瑞職四圭有邸以祀天、旅上帝、兩圭有邸以祀地、旅四望。王制：天子祭天地，諸侯祭社稷，則地示之祭。自不得以社當之。然此經序祭有社，無示、司徒、鼓人職以雷鼓、鼓神祀，以靈鼓、鼓社祭，亦言社而不及示。典瑞職以圭璧禮諸神祀地之外，不著社稷。大司樂分樂以祭，亦不別著社稷於祭。

地之後二者又言示而不及社、似乎彼此互見、而示祭社祭禮無殊也、勉齋黃氏曰、社祭土、稷祭穀、土穀之祭達於上下、故方邱與社皆祭地也、而宗伯序祭有社無圻、舉社則其禮達於上下、舉示則天子獨用之、鼓人職不曰祭示而曰社祭、亦以其禮達乎上下也、大司樂靈鼓靈鼗以祭地、示則示祭社祭、其用同矣、此說較之賈疏所謂以小該大者、尤爲長於理而合於經也、祭法王有大社、又有王社、張子曰、大社祭天下

之地示王社。祭京師之地示。說本白虎通竊意。大社立於王宮。乃祭京師之地示。京大也。師衆也。京師之社。固可稱大。王者無外。社繫以王。則祭天下之地示也。此禮惟王有之。諸侯以下則否。王社所在。書傳無文。其卽澤中之方邱與。射牲之後。未有不陳其血者。故戴記曰。郊血而此於社稷以下。始言血祭。蓋社稷五祀皆有人鬼薦血以歆神。兼以人道事之也。古者山川之守死而爲神。故春秋傳曰。姜太嶽之後也。又曰。

臺駘汾神也。以人鬼配食，故亦有薦血之禮。以是推之，山林川澤之小者，配食無主名，則唯用狸沈可知矣。疏謂嶽瀆亦當狸沈，如臺駘為汾神之類，又宜兼薦血，蓋經文每互見，故於社稷五祀五嶽舉其禮之繁者，山林川澤舉其事之多者。舉昊天上帝而不言方澤，何也？天地之德無物可以稱者，實柴禋燎不過以氣求之於陽，血祭瘞埋不過以魄歸之於陰，而聖人所以昭格於皇天后土者，惟在於精意。故實柴禋燎乃祀天之所同，而

以屬日月星辰以下，陳血瘞埋乃祭地之所同。

而以屬社稷。五祀以下又不言方澤。以示禋祀與昊天上帝同也。周官之文彼此互見。昊天上帝別見於司服。司裘以未見禋祀。故於大宗伯職揭之。五帝同用禋祀。別見於大司寇。故宗伯職畧焉。冬至圓邱。夏至方澤。別見於大司樂。四圭祀天。兩圭祀帝。別見於典瑞。宗伯職不舉方澤。義別有在。而羣儒乃謂古無方澤之祭。誤矣。王社大社之說。出自祭法。白虎通畧同。乃東漢諸儒。撫拾戴記而爲之。周秦間古書未嘗有

此蓋王都唯建一社故名大社或稱王社別無祭天下之地示之社以有方澤之祭故也或以方澤無配享之人鬼疑并無此祭不知古者宗廟之祭亦不設女尸地統於天故無配享者非若社爲司穀土之神可以句龍配也 胡仁仲謂王者父天而母地埽地而祭者唯昊天上帝地示則唯有社祭並無所謂方澤蓋據此經及鼓人以靈鼓鼓社祭皆不言大示而諸傳記亦多以郊社對舉故妄爲此說不知周官中雖有

爲莽歆所僞竄者而大司樂章則漢文帝得魏

文侯時樂工竇公所獻司馬遷封禪書首舉虞

周之典祀直引其文史記周官曰冬日至祀天於南郊迎長日之至夏日

至祭地示皆用樂舞而神乃可得而禮也則是篇乃周官之舊明矣

戴記曰器用陶匏以象天地之性也又曰天地

之牛角繭栗則祀天祭地儀物皆同可知矣又

曰因天事天因地事地又曰燔柴於泰壇祭天

也瘞埋於泰折祭地也又曰以祀天地山川社

稷先古七十子之徒各記所聞而大體不易則

不得謂社祭之外別無方澤之祭昭昭然矣。鼓人首舉社祭義已見前。其他傳記則或以便文或舉下以該上。玩其本文義自可辨。無庸徧舉也。至引父在爲母期爲證。則悖甚矣。父歿卽得伸。則非恩義之有輕重也。以期爲斷。所以達父之情而便其事耳。而子之居處飲食哭泣思慕。猶三年。則所以自盡者。實與父同。而無二可見矣。記曰。地秉陰。竅於山川。播五行於四時。蓋五行質具於地。而氣行於天。其用雖分。而實合。

故其祭雖合而亦分四郊迎氣爲四時也故主
祀五方之帝而以五人帝配焉以其質具於壇
故又用血祭而以五正配焉君道同於天故以
配天神臣道同於地故以配地示鄭注五官之
神蓋舉配祭者而所正祭乃水火金木土之神
故以列於五嶽之上也左傳晉史墨所稱社稷
五祀及大戴禮宰予問五帝德篇孔子謂五官
別稱五祀不得同帝正此經所謂五祀也但與
四郊同日同壇或異日異壇則無考矣 火正

曰祝融土正曰后土傳有明文而康成謂黎爲
祝融后土食於火土蓋惑於史記北正黎司地
之說不知司馬遷所云或顓頊時曾命黎兼司
火土而祀典則定祀句龍康成不能辨乃於大
封先告后土亦云黎所食則誤之中又誤矣
方道希曰上舉五嶽下及山林川澤則四瀆從
五嶽之禮不待言矣

以肆獻裸享先王以饋食享先王

先鄭以禘祫釋追享朝享蓋以追遠之祭極於

禘祫則羣廟之主並朝於祖廟也不曰祫而曰肆獻者時祭亦祫惟大祫徧陳毀主必曰肆獻而其義始著也不曰禘而曰禘者時祭皆自禘始於時祭之外特言禘則爲禘祀可知蓋求神於陰於極遠之祖尤以禘爲合漢之本也禘自既灌而後孔子不欲觀可徵魯人尚知禘尤重禘也六宗皆禘而於昊天舉禘祀義與此同別有饋食者凡大祭祀必散齋致齋數舉則國事將有滯壅故於禘祫時祭外減去禘及朝踐以前之禮節而自饋食始虞禮記禘後吉祭猶未

配以及月朔朝廟歲時薦新或因事而特祭皆宜用此。大宗伯該備典祀不舉饋食則宗廟之祭有遺。司尊彝惟辨大祭祀裸獻之彝器故小祭祀不備裸獻朝踐者無列焉。義各有當也。肆陳也。列也。按尚書眚灾肆赦春秋肆大眚韓非子慮事廣肆似兼周徧之義大祝肆享亦謂大禴享先公則驚寘別見司服職故舉先王以包之。

以荒禮哀凶札

大司徒職大荒大札則令邦國移民通財饑饉
更事方嶽中鄰近之國以王命通財古者以粟
米為財則不惟無遏糴之患亦並非告糴之私矣至移
民事更重大或於本國相移或移於鄰國必禮
有經式然後其國得以情告而司徒以王命制
之也

以弔禮哀禍哉

春秋傳曰陳不救火許不弔災君子以是知陳
許之先亡也可見成周盛時天子哀邦國之憂

而諸侯同方嶽者皆重救患分裁之禮所以養諸侯而兵不用也。

以禴禮哀圍敗

成周六服承則孰敢擅興而有哀圍敗之禮何也蓋聖人監古立法而知世變之所窮且蠻夷內侵不寧侯馮弱犯寡雖盛世亦間有之或事過而後聞不惟有威讓之令舉九伐之師且厚恤受兵之國義盡仁至所以懷諸侯而天下畏之也古者百用皆以粟米圍敗之後惟歸財爲

急用此知六服中邦國所貢閒田所入之粟米。蓋隨地而貯之。以共不時之興發。

以恤禮哀寇亂

東遷以前及春秋之初，邾婁顏爲賊於魯。天子爲之誅顏而定魯侯國之外寇。猶能討焉。曲沃奪宗，周師再伐，衛朔構禍，王人出救，侯國之內亂，猶將恤焉。蓋周公之典具存，其人亡，故不能舉耳。

時聘曰問殷頑曰覲

時聘無常期。諸侯或有故不得朝，則遣問起居。殷、類則王室有故，慶喜弔憂而六服皆使人來視也。

以軍禮同邦國

必能四征不庭，然後六服羣辟罔不承德。必有用衆恤衆，簡衆任衆，合衆之禮，然後能以天下爲一家，中國爲一人。故曰以軍禮同邦國。大師之禮用衆也。

大師或天子親征，則大司馬巡陳，眡事若常武。

之詩程伯休父左右陳行是也。或命將出師如采芑。江漢獨遣方叔召虎是也。簡書徵調如臂指之相使。敵王所愾如手足之衛頭目。是謂能用其衆。地官正貳及攷皆曰大軍旅。至大小宗伯始變文曰大師何也。伍兩卒旅師軍以所合徒役之多寡爲之名耳。春秋傳有衆一旅師田非合五百人不可用故舉軍。故方起徒役則曰軍。旅用以征討則曰師。大司馬職曰及師大合軍以行禁令以救無辜。伐有罪肆師職亦曰若師不功則厭而奉

主車大宗伯言用衆小宗伯從王征伐故正其名曰師

大均之禮恤衆也

春秋傳魯賦於吳八百乘邾賦六百乘若爲子男則將半邾以屬於吳而如邾以事晉蓋不獨徵兵以車乘爲差田役貢賦之數亦如之故大均屬軍禮平邱之會子產爭承曰鄭伯男也而使從公侯之貢懼不給也則不均之病衆明矣注疏及諸儒所言皆侯國均人之事非干朝大

均之禮所及也。大均蓋量其土地之饒瘠。道路之遠邇。國事之劇易。以爲貢賦征役多少。疏數之差。

大田之禮簡衆也。

春蒐秋獮。卽諸侯以講武事。則其君之賢將之武。號令之嚴明。與反是者。皆可得而見矣。必如是。然後事有本統。可使百將一心。六軍同力。車徒刺伐。所簡之末節耳。

大役之禮任衆也。

大役或建都邑如仲山甫之城齊、燕師之城韓、必調方嶽之中、地域鄰接者以屬役也。或濬大川、或築大防、非傳衆力不能濟、度道里之遠近、量穀土之饒瘠、時年歲之豐凶、乃所以任之。大封之禮合衆也。

師有功、或王臣出封、或羣侯加地、進律其禮皆屬大封。春秋傳：殷民七族、殷民六族、懷姓九宗、職官五正、乃始封之禮。王制：諸侯之有功者、取於閒田以祿之。春秋傳：襄王賜晉南陽之田、命

爲侯伯、乃加地進律之封、皆合其土地人民以
相附屬也。大司馬制畿封國、卽大封之禮也。
制軍詰禁、卽大師之禮也。施貢分職、卽大均之
禮也。簡稽鄉民、卽大田大役之禮也。大司馬職
論造邦之經式、必合其衆而後可用也。故自大
封始。大宗伯職論軍禮之重輕、則莫要於大師。
而衆不可以猝然而用之也。必先恤之以得其
心。簡之以辨其材。任之以程其力。至論功行賞。
然後析圭分社。加地進律之典施焉。故以大封

終。大均屬軍禮。惟均乃可以作師徒。賦馬牛車輦也。大役屬軍禮。古者城築卽屬役於師旅也。大封屬軍禮。示侵敗王畧。則六師及之也。

以嘉禮親萬民

民之秉彝。於兄弟昏姻朋友故舊賓客。本有相愛相敬之實心。所謂嘉也。然無禮以爲之節文。則親者或以昵而潰。疏者或以遠而忘。故先王制禮以達其嘉好之心。乃可以常保其親。而不至於乖戾。易曰。嘉會足以合禮。人之行禮苟無

此嘉好之實心。則雖循其外之節文。亦不足以合禮也。饗燕。脰膾。賀慶之禮。達乎諸侯。賓射之禮。達乎卿大夫士。惟飲食昏冠之禮。下逮庶人。而統曰以親萬民者。詩曰。爾之教矣。民胥效矣。凡用於朝廷邦國者。皆所以使民觀感而親睦也。

以飲食之禮親宗族兄弟

曰宗族。則無不包矣。而又曰兄弟。何也。古者大功以上同財。朝夕相見。無所用合食。故特標兄

弟凡小功者謂之兄弟以示惟小功以下及宗族乃有合

食之禮也蓋勢散而情疏非合食則情意不通

憂喜不聞而其中又有貧富貴賤之別則見為

弗顧而以此相尤者多矣天子諸侯之體尊非

族食雖期大功有不得時見者故世降一等而

親者尤數皆所以為教而使民效之也

以賓射之禮親故舊朋友

詩曰朋友攸攝書曰太史友內史友先王與羣

下皆以朋友視之故賓射之禮答其拜與之坐

皆朋友之道也。古之爲臣者，居其位則思死，其官而君爾，忘身豈不以此也。與

以饗燕之禮，親四方之賓客。

周官王朝於聘使，無饗燕之禮。惟諸侯之臣相爲國客，乃有之。疏所云聘客一饗燕，與時賜無數。惟公之孤執皮帛以繼小國之君者，宜有之耳。詳見大小行人職。

以服膳之禮，親兄弟之國。

見於春秋經傳者，歸服賜胙，未有言歸膳者。傳

曰天子有事膳焉謂二王之後以助祭而受膳
非歸之於其國也兄弟之國受膳亦以助祭故
大行人言歸服不言歸膳公穀注皆生日膳熟
曰燔以熟賜則爲助
祭者明矣但服之是亦不可以達
遠豈痛於鹽而乾之然後以致與

再命受服

一命亦有服而必玄冕乃得言受服猶子男亦
有卿而必王朝孤卿立兩卿始得言受官也司
服職卿大夫玄冕疏謂無孤之國卿亦得緇冕
顯與經悖

三命受位

春秋傳管仲辭卿禮曰有天子之二守高國在
樂盈之奔曰陪臣盈得罪於王之守臣晉鞏朔
獻捷於周王使詰曰未有職司於王室以是知
列國之卿必受命於王然後爲有位也

七命賜國

子男五命侯伯七命具列行人職則六命者惟
王朝孤卿不待言矣都鄙賜則已前見故但言
賜官子男賜國不待言故但言賜則也於七命

言賜國則子男之未成國可見矣於六命言賜官則孤卿地廣事繁得立其兩與小國之一卿異而七命成國有備三卿者皆可推矣

九命作伯

鍾旼曰薛氏季宣謂上公九命加一命爲二伯非也二伯王官也其職與四岳同不宜以外諸侯兼宋於周爲上公不聞兼王官之職又謂上公之孤四命加一命爲縣內諸侯亦無所據李光坡曰職服位器皆曰受者自下言之則與

曰四方、疑五嶽、四鎮、四瀆、禮神皆用之、皆有牲幣、各放其器之色、

玩注意、蓋謂祭禮之有幣、與賓禮酬爵之幣同耳、賈疏遂謂獻尸別有酬爵之幣、失之愈遠矣、凡告用牲幣、並不立尸、至瘞埋於泰折、則更無尸之可立矣、凡行過山川之禮、亦然、安得以幣爲酬爵之幣乎、卽謂正祭獻尸、有從爵之幣、亦不可通、果爾、則經記宜明著之、古書中亦必有旁見其徵者、此臆說也、

以天產作陰德以中禮防之以地產作陽德以和樂防之

祭之始薦血燔芻以求神於幽所以作陰德也。此近於鬼道故以禮儀爲節所以防其過薦黍稷內羞以養神於顯所以作陽德也此純乎人道故以和聲合漠所以防其過。上經舉禮神之玉次及牲幣次因天產而及地產並著求神於陰陽之義注及羣儒舍祭祀而別求其說是以多端而未得其理也。

以禮樂合天地之化、百物之產、以事鬼神、以諸萬民、以致百物。

以禮樂合天地之化、如二至禋祀、四郊迎氣、四時孝享之類、合百物之產、如上經所謂以天產作陽德、以地產作陰德、及菹醢以水草陸產、相間之類、致百物、則煦嫗覆育、不殞不殍、而致四靈百物之祥是也。李光坡曰：此推言禮樂之功用也。人君建中和之極、萬民服中和之教、則氣之所感、天地所合、陰陽相得、煦嫗覆育萬物。

草木茂句、萌達羽翼奮角、絡生蟄蟲、昭蘇胎生者、不殞卵生者、不殞、所謂合天地之化、百物之產也、致百物謂致物產之祥。

凡祀大神、享大鬼、祭大示、帥執事而卜、日宿、眠滌濯、泄玉鬯、省牲、鑊奉玉齋、詔大號。

玉鬯、玉齋、惟宗廟社稷用之、非禮神之玉也、知然者、太宰職祀五帝、贊玉幣爵之事、祀大神示亦如之、則禮神之玉、贊奉者太宰也、其職於享先王、後特言贊玉、八玉爵蓋惟以人道享之、乃

有玉八玉爵太宰既贊玉八玉爵故宗伯所掌
惟玉鬯玉盞也於玉鬯曰涖者小宰贊裸宗伯
惟涖玉鬯而已於玉盞曰奉者肆師表盞盛告
潔宗伯則及時而親奉焉宿祭之前夕也注訓
申戒似因太宰視滌濯然不害宗伯與太宰並
視上經雖並列大神大示大鬼而玉盞疑惟
宗廟用之古者器用陶匏以象天地之性雖周
人質文兼用有蒼璧黃琮而爵不用玉

太宰禮五帝分

玉幣爵爲三則爵非玉可知
爵不用玉則簠簋

下祀先王始言玉八玉爵

月
可推矣、日月星辰五嶽四瀆之禮、宜從天地下
此則小祀也、贊玉盞九嬪而外、無別見者、亦可
相證、魯語臧文仲以鬯圭玉磬如齊告糴、則
玉鬯卽鬯圭、鬯圭卽瓚也、瓚盛秬鬯而曰玉鬯、
猶敦盛黍稷而曰玉盞耳、

若王不與祭祀則攝位

量人宰祭則與鬱人受罍、歷是冢宰亦攝祭也、
豈王有疾則宗伯攝位、而亮陰則冢宰攝與、
凡大祭祀王后不與、則攝而薦豆、邊徹、

薦徹皆攝、則果獻之攝可知、外宗職可互見也、
以是知宮中小祀、后不與、則祝畢獻、蓋大祝付
練祥、掌國事、小祝小祭祀、掌事、曾子問、王崩、既
殯、五祀之祭不廢、祝主之可與周官互證、
大賓客則攝而載果、

注謂君無酌臣之禮、故宗伯攝王爲禋、非也、辨
見大行人職、

王命諸侯則饋

觀烝祭歲而告周公、其後則天子亦因祭發命、

詩云告于友人錫山土田必因愷獻也若不當祭期則特告曾子問告用牲幣康王命畢公保釐東郊王朝至豐則告於文王之廟也而不及祀事必用幣帛皮圭加牲以告而祭之儀不具國有大故則旅上帝及四望

上帝而曰旅者徧川事於四郊所祭非一帝也

春秋傳鄭子產廩火祈於四鄰蓋其遺制

乃頒祀于邦國都家鄉邑

鄉邑謂鄉遂及公邑其地皆有社蜡醮禁因國

之祀注謂都家之鄉邑誤。宗伯職獨無正月
之吉始和布禮於邦國都鄙云云者治教政刑
隨時損益禮則一定而不可易無庸每歲和而
布之也禮不下庶人闔門鄉黨之禮則十有二
教具矣若郊廟朝廷邦國之禮則當官者自肄
之無事縣於象魏使萬民觀之。